

KORINTH
Mingei Kôma Paul
Lekhamuthuon Inikna
Chongmaruoi

Korinth mingei kôma Paul lekhamuthuon inikna hih Korinth koiindangnei leh a miziekpu in-zomna intakna aom lâitaka miziek ani. Koiin-danga mi senkhatngeiin ânlangin Paul an doi sabak ngâi, aniatachu Paul'n inngêinôk ranga a nuomna inthûk tie a minlang pe ngeia, in-gêinôkna ahong tung tena chu a râisâna lien tie a misîr pe ngei ani.

Hi lekhamuthuon hin amoton tieng chu Paul'n Korinth koiindang leh an inzomna roi a misîra, koiindang sûnga bâiinkhamna suok ngâi ngei le mi doi ngâi ngei chongna taka a thuon ngei tie rilsensâiin, ma chongna sika insîrna le in-gêinôkna asuokna chung a râisân tie a misîr sa ani. Masuole chu, Judea rama Khristien ânsam ngei sanna ranga ngâihoi chôiruol tho rangin koiindang a ngên ani. Abung mongna tieng ngei hin chu Korinth koiindanga mi senkhat, tîrton dik ki ni intia, Paul chu tîrton dikloi kêng ti ngâi ngei doiin Paul a tîrtonnina ân rung ani.

Asûnga chongtângpuingei
 Chongmaruoi 1:1-11
 Paul le Korinth koiindang 1:12—7:16
 Judea rama khristienngai ranga chôiruol 8:1—
 9:15

Paul'n a fírtonnina rachamneina ân rungna
10:1—13:10
 Chongkhârna *13:11-13*

¹ Paul, Pathien lungdoa Khrista Jisua fírton, le ei lâibungpa Timothy ngei renga han,

Korinth taka Pathien koiindang, male Achaia ram pumpuia Pathien mingei murdi kôm han:

² Pathien ei Pa le Pumapa Jisua Khrista'n moroina le inngêina nangni pêk rese.

Paul'n Pathien kôm râisânchong a misîrna

³ Ei Pumapa Jisua Khrista Pathien le Pa, mulungjûrpuina sip Pa, sannangei murdi juongna Pathien kôm han râisânchong misîr ei tih u!

⁴ Ama'n ei intaknagei murdia mi san ngâia, masikin eini khom Pathien renga sanna ei man nanâk hah mangin midangngei an intakna murdia ei san thei ani. ⁵ Khrista tuongna tamtak ngei han rangtum ei dôn anghan Khrista jârin

Pathien sanna lien khom han rangtum ei dôn ani. ⁶ Kin tuongin chu, mahah sanna le sanminringna nin manna rang ania; sannin kin omin chu, hanchu nangni khom sannin nin oma

male tuongna kin tuong hah tuongdierna dôna tuong rangin râtna pêkin nin om ani. ⁷ Masikin nangni kin sabeina hah innîk tet ngâi mak; kin tuongnageia rangtum nin dôn anghan sanna

kin manna ngei khoma hin rangtum nin dôn sa tiin kin riet.

8 Lâibungngei le sarnungei Asia ramhuol sũanga intakna kin tong roi hah nangni minri-etnôk kin nuom. Kin chungga puokrikngei hah alien rai sik le arik rai sikin la ring rangin sabeina reng dôn khâi mak me. 9 Kin chungga thina rangin roi an jêkmasat angin kin riet. Hannirese maha chu keinia hin minngam loiin Pathien mithi kaithoi nôkpu kôm kin minngam theina rang sika alei ni. 10 Ma anga thina chiruoi inrîngomngei* renga hah mi sanminring zoia, mi la sanminjôk atih, male kin sabeina ama chungga kin minngama, ama'n mi la sanminring nôk atih, 11 nangni khom kin ta rangin chubaithonangeia mi nin san anghan. Masikin kin ta ranga chubaithona tamtak ngei hah thuonin om a ta, male Pathien'n sat mi vur a ta; male mi tamtakin kin ruthûlin a kôm râisânchong misîr an tih.

Paul Mintuonangei a thûlna

12 Hi rammuola kin ringnuna leh aliekin nangni le kin inkainangei han munisi vârna sika ni loiin Pathien moroina sinthotheina sikin Pathien-pêk ngamna† le takintâinân roi ajêka mi mindeta kin sielesarietnân mi ril sikin kin inpâkpui ani. 13-14 Nin pore thei le nin rietthei kai kêng nin kôm kin miziek. Nikhomsenla atûn hin la rietthei sabak no khom ungla, mi la rietthei tatak nin tih, tiin ka sabei ani, ei Pumapa Jisua Nikhuo han nangni kin minpâk anghan mi nin minpâk theina rangin.

1:8 1:8: 1 Kor 15:32 * **1:10** 1:10: thina chiruoi inrîngomngei; miziek senkhat ngei an dôn chu thina chiruoi. † **1:12** 1:12: ngamna; miziek senkhat ngei an dôn chu inthiengna.

15 Mangei murdi hah ki riet minthâr sabaka, vélNIK satvura nin om theina rangin nangni hongpan bak rangin mintuonangei ki sin ani. 16 Macedonia rama ke se balamin nangni hongpana, ko hongkîr nôk tieng khom nangni hongpan nôk rangin ki mintuo ani, Judea rama ku khuolchaina ranga han mi nin san theina rangin. 17 Hi anga mintuona sika hin mintuona thûldul mi anghan kên lang mini? Ki mintuonangei ki sin lâihan, ranghuolna bôknangei renga ki sin mo, “Ani, ani” le “Niloi, niloi” voikhat rengin ti ranga ânzoï sai mini? 18 Adiktakin Pathien'n chongtakin a chong ngâi anghan, nin kôma ko chonginkhâm khom hah “Ani” le “Niloi” nimak. 19 Jisua Khrista, Pathien Nâipasal, a thurchi nin lâia Silas, Timothy le keïman kin misîr hah, “Ani” le “Niloi” hih ani loi sikin. Ama hih Pathien “Ani,” 20 Pathien chu ama chonginkhâmngai murdia “Ani ngâi” ani sikin. Masika han kêng Jisua Khrista jârin Pathien roïnpuina rangin “Amen” ei ti ngâi ani. 21 Ma hih eini mi sinpu Pathien lelê ania, nangni leh munkhata, Khrista leh inzoma ei ringna mi min thîk pea; ma hih atheïpiela mi darpu Pathien nanâk hah ania, 22 ei chungã pumanina a sînthona darpu, le ei ta ranga neinun a lei mintûp murdi hah khâmna anghan ei mulungrîlNGei sûnga Ratha Inthieng mi pêk ani.

23 Ni rietpuipu rangin Pathien ko koia—ku mulungrîl a riet ngâi! Nin ruthûla Korinth khuoa se khâi loi rangin ka masat zoi ani. 24 Nin

iem ngêt rang thurchi nangni misîr pe rang pût mak mea; taksônna han nin inding det tiin kin riet. Manêkin, nangninanâk nan râisâna rangin nangni leh sin kin tho ani.

2

¹ Masikin nangni minngûi nôk ranga nin kôm hong khâi loi rangin ku mulungbôk ki sinsiem zoi. ² Nangni minngûi ronga tumo râisân mi shak ranga? Ki minngûi loi tute om mak ngei. ³ Masika han kêng ke lekhamuthuon hah nin kôm ki miziek — râisân mi shak rang ngei tak hah nangni minngûi ranga hong rang chu nuom mu-ung. Ka râisânin chu nangni khom nin râiasân ngâi ti ki riet sikin. ⁴ Mulungbôk injêl leh beidong takin le mitrithingei tamtak tâkpuma ki miziek ani; ke neinunkhîn chu nangni minngûi loa, nin rêngin kho dôr mo nangni ku lungkham hih nin riet theina rang sika ani.

Asaloithopu ranga ngâidamna

⁵ Atûn, hin tumakhatin nangni minngûiin chu, keima mi minngûi nimaka, nin rêngin nangni minngûi ri-riek let ani. (Hima hih ki tina abitak chu a chungar ânngar rai ku nuom loi sika ani.) ⁶ Ha mi hah chu nin lâia mi tam uolin ma anga dük nin tho hah ahun zoi ani. ⁷ Nikhomresea, atûn, ngâidam unglâ male ama hah mohôk roi, ânngûi phar loina rangin. ⁸ Masikin ama hah nin lungkham tatak ani ti nin min riet rangin nangni ki ngên. ⁹ Nin kôma lekhamuthuon ki miziekna bi tak chu minsina han nin lei hong indingdet le nangni ki rilna chong zoratin

jôm tit rangin nin inthok mo ti riet ku nuom sika ani. ¹⁰ Tukhom amanu mo amapa mo a sintho chungã nin ngâidam tika chu kei khom ka ngâidam ngei ani. Kei khomin ka ngâidam sa ngâi. Ka ngâidam tika chu, adiktakin, i-ih khom ngâidam rang ka nâng kai chu nangni sikin Khrista makunga ka ngâidam ngâi ani, ¹¹ Soitan'n ei chungã zorânchum a man loina rangin; a mintuonangei hah ei riet chien sikin.

Troas taka Paul mulungdûktongna

¹² Khrista Thurchi Sa misîr rangin Troas taka ku tungin chu, mataka sintho rangin Pumapa'n lampui mi lei mo-ong pe ku mua. ¹³ Aniatachu ei lâibungpa Titus ku mu loi sikin ka kângdoi sabaka. Masikin mataka mingei hah he hoiin ka mathân ngeia Macedonia rama ke se zoi ani.

Khrista jâra motorna

¹⁴ Hannirese Pathien kôm râisânchong om rese! Khrista motorna sika lampui jûina han mi intângngei anghan Pathien'n Khrista leh in-zomin mi ruoi tit ngâi sikin. Khrista rietna thurchi hah muntina mirimhoi angin minzar rangin Pathien'n mi mang ngâi ani. ¹⁵ Keini chu Khrista'n mirimhoi hâla Pathien kôma pêk sanminring tira om ngei le ânmanng tira om ngei lâia minzar anghan kin ni. ¹⁶ Ânmanng tira om ngei ta rangin chu thina rang mirimsie ania; aniatachu sanminring tira om ngei ta rangin chu ringna rang mirimhoi ani. Hanchu, tumo ha sin thothei rangin achuk rang ani zoi? ¹⁷ Midangngei

tamtak chu Pathien chong hi sadâi thonân an mang anghan keini chu nimak mea; hannirese Pathien'n mi tîrna sikin kêng Khrista tîrlâmngai anghan Pathien mitmua takintâi takin kin chong ngâi ani.

3

Chonginkhitna athara Tîrlâmngai

¹ Eini nanâkin ei insong nôkrêk rang mo ani zoi? Nônchu, midang senkhatngai anghan rilminsana lekhamuthuonngai nin kôma rang mini, nin kôm renga mini ei nâng mini?

² Kin lekhamuthuon dôn chu nangninanâk hah ania, mitin riet rang le pore ranga kin mulungrîlŋgeia miziek nin ni. ³ Hi lekhamuthuon hih Khrista lelên a mizieka keini mi hong min chôî tiin ânthâr ani. Hima hih pentuia miziek nimaka, Pathien ring Ratha leh miziek ani, male lungpêkŋgeia miziek khom nimaka, munisi mulungrîlŋgeia miziek kêng ani.

⁴ Khrista jârin Pathien kôm ngamna kin dôn sikin mahah kin ti ani. ⁵ Hi sin tho rang hin ite thotheina le inti theina rangin phalna keinia hin omak. Thotheina kin dôn chu Pathien renga juong ngâi kêng ania; ⁶ ama han balam mizieka niloiin Ratha taka chonginkhit athar sinthopu ni thei rangin mi sin zoi. Balam miziekin thina amintung ngâia, Ratha rêkin chu ringna a pêk ngâi.

3:3 3:3 Jôk 24:12; Jer 31:33; Ezek 11:19; 36:26

3:6 3:6: Jer 31:31

7 Balam hah lungpêkngesia lekhabulngesia miziek ania, pêka aom lâihan Pathien roiinpuina ânlang ani. Moses mâia vâr hah duoi tetet khomsenla, maha ala rât oka, Israelngei han an mitngei leh ama ha enlak thei mak ngesia. Balam mangin thina amintung ngâi luoi ha, madôra roiinpuina leh ajuongin chu, 8 Ratha sinthotheina hah idôra roiinpuina lien uol mo ani rang ani zoi! 9 Theiloï mintumna mintung ngâi lu mana a roiinpuin chu; sanminringna mintung ngâi sinthona ha idôr taka roiinpui uol mo ani rang ani zoi! 10 Roiinpuina vâr uol ok sika han zora vunsia roiinpuina vâr hah chu om khâi mak kin ti thei. 11 Ma chomolte rang lu mana roiinpuina aomin chu, tuonsôta rang vângin chu idôra roiinpuina lien uolin mo aom rang ani zoi na!

12 Ma sabeina hah kin dôn sikin kin hâi ani. 13 Keini ngei chu Moses anghan nimak me, ama han vâr achuoi tetet le boipharna hah Israel mingeiin an mu lina rangin a mâi hah a mukhûa. 14 Adiktakin, an mulungbôkngesi hah ânkhâr ania; male aviensûn tena khom hin chonginkhit muruo lekhabungei ha an porên chu ma mukhûna nanâk han an mulungbôkngesi ha amukhû ngâi. Mîn Khrista a zom tika vai kêng ha mukhûna hah pai ani ngâi. 15 Aviensûn tena khom hin Moses Balam, an pore racham ha mukhûna han an mulungbôkngesi ala mukhû tit ngâi ani. 16 Hannirese Pathien lekhabu'n

Moses chungroi a lei ti anghan, ha mukhûna hah pai thei ani: “Pumapa tieng a hônhei lehan a mâi mukhûna hah paiin aom zoi.”* 17 Atûn, hi muna, “Pumapa” ti hi chu Ratha ania; male Pumapa Ratha omna nâma chu zalena aom ngâi. 18 Hanchu, kin rêngin mâi mukhû loiin Pumapa roiinpuina min-êlin; male ma roiinpuina nanâk han, Pumapa renga juongpu, Ratha hih, roiinpuina lien uolin ama angin eini mi minthûl ngâi ani.

4

Pilbêlgeia Rathatienga rochon omngei

1 Pathien'n a mulungjûrpuinân hi sin hih tho rangin mi pêka, masikin kin jâminzal mak. 2 Neinum inthup le inzakpui om sin ngei hah kin mâka; milak leh sintho mak mea, Pathien chong mi huongnân khom mang mak me. Chongtak vârna akipin Pathien mitmua han mitin sielesarietna mi mitngei mintung rang kin pût ngâi. 3 Kin thurchisa misîr hih thupin aomin chu ânmanng tir ngei renga vai thupin aom ani. 4 Hi rammuola pathien saloi han an mulungbôkngai hah ijinga a dar pe ngei sikin an iemloi ani. Khrista, Pathien le in-angna dônpu roiinpuie tie Thurchi Sa vâ an chungga ajuong inlang hah an mu lona rangin an mitngei hah a mincho pe ngei ani. 5 Keini kin roi misîr mak mea; Jisua Khrista chu Pumapa ani ti kêng kin misîra, male

* **3:16** 3:16: Aniatachu ma mukhûna hah mîn Pumapa tieng ânhei tikin chu pai thei ani tiin Arachang 16 hih melet thei ani.

keini khom Jisua jârin nin tîrlâmgei kin ni ti kin misîr ngâi. ⁶ “Aĵing renga avâr hong vâr suok atih!” a tipu Pathien nanâk hah ani, Khrista mêla Pathien roiinpuina vâr suok kin rietna rangin kin mulungrîngeia a minvâr zoi.

⁷ Hannoma keini rathatienga rochon dôn ngei hih pil bêlgei anghan kin ni, sinthotheina lientak hah kin ta niloiiin, Pathien ta ani ti ânlang theina rangin. ⁸ Bâiminkham pe bangin kin oma, aniatachu, duoi uol ngâi mak mea; akâra chu mulungĵingin kin oma, male kin beidong tet ngâi maka; ⁹ râlngei tamtak an oma, aniatachu mal le ruol dôn loiin om tet ngâi mak me; male mophop nôinekin om ngâi khom rong unga, sietminmangin chu om mak me. ¹⁰ Khotiklâi khom kin takpumngei thitheia hin Khrista thina kin ruput tit ngâi, a ringna khom kin takpumngei hin ânlang theina rangin. ¹¹ Kin ringkâr chu Jisua jârin thi rang ichi omin kin om tit ngâi, a ringna khom kin takpumngei thitheia hin ânlang theina rangin. ¹² Mahi aomtie chu keini rangin thinân sin athoa, aniatachu, nangni rang rêkin chu ringnân sin atho ani.

¹³ Pathien Lekhabu'n, “Ki iemna sikin thurchi ki misîr ani,” ati anghan, ha taksônna ratha nanâk han keini khom kin iem sikin thurchi kin misîr ani. ¹⁴ Pumapa Jisua aringa kaithoipu han keini khom Jisua leh mi kaithoi del a ta, male nangni leh a makunga mi tuong atih ti kin riet. ¹⁵ Hingei murdi hih nangni jâra ania; Pathien moroinân mi tam uol chungâ atungtir

anghan, manglei han Pathien roiiipuina rangin râisânchongrilna chubaithonangei Pathien kôm min tung u-uol an tih.

Taksônnân ring

¹⁶ Masika han kin jâmminzal tet mak me. Kan taksatieng hih hong mon titir khomrese, kin rathatieng chu anîngtin sinmintharin aom bang ani. ¹⁷ Hi chomolte ranga kin dûktongna achînte hin kumtuong roiiipuina lientak kin dûktonga nêka lien uol mi sin pêng atih. ¹⁸ Mu thei neinunngעי chu thîr mak mea, mu theiloï neinunngעי kêng kin thîr ani. Mu thei neinunngעי chu chomola rang an nia, aniatachu mu theiloï neinunngעי chu tuonsôtin om tit an tih.

5

¹ Hi ei omna pilchung puon-in ei takpum hi rammuol chung a hih sietchit khomsenla, invâna omna rang in Pathien'n ama nanâkin mi sin pe, tuonsôta aom tit rang in det ei dôn tiin ei riet. ² Male atûn hin invâna ei omna rang in renga han mi mukhû rang ôi tatak in inrum tatak ngâi ani; ³ Maha ei insilin chu takpum boiin om no uh. ⁴ Hi pilchung puon-ina ei om lâihin sirdêna sikin chapin ei inrum tatak ngâi ania; hi ei pilchung takpum hih mâk ei nuom sika niloïin, aniatachu invâna in mi mukhû rang ei nuom sika ani, masikin hi thitheï hi ringnân ânthûl rang ani. ⁵ Hi inthûlna rang mi mintuo pepu chu Pathien ania, male eita ranga neinun a lei mintûp murdi hah khâmna anghan Ratha mi pêk zoi ani.

⁶ Masikin zoratin hâinân kin sip tit ngâi ani. Takpum ina ei om kêr chu Pumapa ina om mak me ti ei riet. ⁷ Ei ringnun hih mu theia om niloian, taksônân kêng ei om ani. ⁸ Hâinân ei sipa, ei takpum in hih mâkin Pumapa ina om rang ei nuom uol ok ani. ⁹ Neinun dadang nêkin, hi taka ei omna ina mo, khi khin mo, ama a râiminsân rang ei nuom ani. ¹⁰ Khrista han ei roijêk rangin amakunga ei rêngin ei lân lang pak rang ani. Ei rammuol ringnuna ei sintho ngei murdi asa mo, asie mo, ei man rang rohoingei dungjûiin ei man rang ani.

Khrista jâra Pathien leh malinchangna

¹¹ Pumapa china chang kin rieta, male midangngei khom kin methêm ngâi ania, Pathien'n mi riet minthâr let, male nangnin khom nin mulungrîngeia mi nin riet minthâr tiin ka sabe. ¹² Nin kôm keini nanâkin rilminsana ranga kin pût nimaka; manêk han, nunchan tieng niloia achungtieng ririema ânsong ngâi ngei hah nin thuo theina rangin keini mi nin songna rang abi nangni pêk rang kin pût ani. ¹³ Kin mo tatak mini? Maha Pathien jâra ani. Aninônchu kin vâr mini? Hanchu maha nangni jâra ani. ¹⁴ Khrista lungkhamna han mi jêk ani, mi murdi ta rangin mi inkhat a thia, maha aomtje chu an rêngin a thina han an inlopui sa ani tiin atûn chu kin riet minthâr zoi. ¹⁵ Ama chu mi murdi rangin a thia, masikin a ring ngei han anni ta ranga ring ni

khâi loiin, an ta ranga thia ân thoinôkpu ta rang vaia ring kêng an ni zoi ani.

¹⁶ Hanchu, atûn pêna chu munisi vârnân tute jêk khâi noni ung. Munisi vârnân moton han Khrista hah lei jêk ta khom unglang, atûn pêna chu jêk khâi noning ung. ¹⁷ Tukhom Khrista hah a zomin chu mi thar ani zoia; amuruo chu ahek zoia; athar kêng a hongni zoi. ¹⁸ Ma ngei murdi hah ei râlinchangna renga Khrista jâra a malngei mi minchanga, midangngei khom a malngei minchang theina sin mi pêkpu Pathien han a sin ani. ¹⁹ Kin thurchi misîr chu mahi ani, Pathien'n khrista* jârin munisingei murdi a ruolngeiin a minchang zoi. Pathien'n an sietnangei hah mindon pe ngei khâi loiin, male kho angin mo a ruolngeiin a sin ngei chang thurchi hah, keini mi pêk ani zoi.

²⁰ Hanchu, mahin keini hih, Pathien'n nangni a ngêna hah kin chung a bâng anghan, Khrista ranga chong kin ni. Khrista ruthûlin nangni kin ngên: Pathien râlngei nin nina renga a ruolngeiin nangni thûl rese! ²¹ Khrista han sietna dôn mak, aniatachu ama leh inzoma Pathien dikna hah ei chang sa theina rangin Pathien'n ei sietna hah a minchang sa ani.

6

¹ Hanchu, Pathien moroina nin chang hah asênaboia nin mang minhek lolina rangin keini

* **5:19** 5:19: Pathien'n miriem murdi khrista jârin ruolin a sina; aninônchu Pathien chu Khrista han munisi jât murdi a malngeiin a sin zoi.

Pathien leh munkhata sinthongi hin nangni kin ngên. ² Pathien'n imo a ti rangâi roi:

“Ku lungkhamna nangni min mu rang zora ahong tungin chu,

nangni ka rangâi pea;

nangni ka sanminring nikhuo ahong tungin chu, Nangni ka san ngâi.”

Rangâi roi! Atûn tak hih Pathien lungkhamna chang zora ania; aviensûn hih sanminringna chang rang nikhuo ani!

³ Kin sinthona hin tutên achâina man no rese ngei kin nuom ani, masikin tu lampuia te lamchâishaknangei dar rangin pût mak meh. ⁴ Manêkin, kin sinthona ngeia injêlnangei, dûktongnangei le intaknangei diertaka tuongin Pathien fîrlâmngai kin ni tie kin minlang ngâi. ⁵ Jêm bitin, intângna ina khumin le phenêngin kin oma; sin sôlin, inmurahal inshakin le bungêiin kin om ngâi. ⁶ Kin inthiengna, rietna, tuongdierna, le singna ngei hah, kin lungkhamna diktakin, Ratha Inthiengin, Pathien fîrlâmngai kin ni tiin keininanakin kin minlang ani, ⁷ chongtak kin misîrna sikin le Pathien ranak râtin. Dikna hah doina rang le kin inrunnga rangin râlvovôn kin mang ngâi ani. ⁸ Mirit pêkin le mâimôkinshakin kin om ngâia; êro le minpâkin kin om ngâi. Chongtak kin misîr ngâi, hannoma milakngai intumin kin om ngâia; ⁹ mingei rietloi anghan kin oma, hannoma mi murdi'n min riet; athi anga omin, hannirese, mi nin mu anghan kin ring ani. Dûkmintongin om khom

unglang that chu nimak mea; ¹⁰ inngûiin om khom unglang, zoratin kin râiasân tit; inrieng kêng kin ang, aniatachu mi tamtak minei kin min changa; ite dônloi kêng kin anga, hannoma neinungei murdi kin dôn suolet ani.

¹¹ Korinth taka ruol moroitak ngei! nin kôm ngampengin kin chonga; kin mulungrîngei alienin kin min-onga. ¹² Keini chu kin mulungrîngei nin tieng khâr mak mea; nangni chu nin mulungrîngei kin tieng nin khâr ani. ¹³ Ka nâingei anghan nangni bên atûn hin ki ti ani: ninta ranga nuomnangei kin dôn anghan nangni khom mi minmu roi. Nin mulungrîngei alienin mo-ong roi!

Sonong menenangei doia inningna

¹⁴ Iemloipungei leh munkhatin sin ân-angbangin tho rang pût no roi, maha tho thei aniloi rang sikin. Kho angin mo adik le adikloi an inlop thei ranga? Kho angin mo avâr le aĵing munkhatin an om thei ranga? ¹⁵ Kho angin mo Khrista le Diabol an inruol thei rang? Kho angin mo iempu le iemloipu an dôn inchun thei rang? ¹⁶ Kho angin mo Pathien Biekin le sonong mirimilngei an inmun thei ranga? Eini chu Pathien aring Biekin kêng ei ni! Pathien lelên a ti anghan:

“Ki mingei kôm in sin ka ta
 male an kôm om ki tih;
 Keima an Pathien nîng ka ta,
 male anni ngei hah ki mingei nîng an tih.”

- 17 Masikin, Pumapa'n a tia,
 “Anni ngei hah mâk ngêt unglâ
 male nangninanâkin anni renga atheipielin
 om roi,
 Ite ânthiengloi reng tho tet no roi,
 male keiman nangni pom ki tih.
- 18 Keima nin Pa nîng ka ta,
 male nangni hah ka nâipasalngei le
 nâinupangngei nîng nin tih,
 Pumapa Râtinchung han a ti.”

7

¹ Ku ruol moroitak ngei, hi chonginkhâmngei murdi hih ei ta ranga sin ani. Masikin takpum le ratha min nim thei ngâi neinunnggei renga inkêm ei ta, male Pathien rin puma omin inthiengna mikhipphar ei ti u.

Paul râisâнна

² Nin mulungrîlнгеia mun mi pêk roi. Tute chungâ saloi tho mak mea; tute siet mak mea, tute chungâ khom inlâpna rok uol mak me.

³ Mahi theiloi nangni minchangna ranga ki ti ni maka; motona ke lei ti anghan, mi nin moroi sabak sikin munkhatin ei om tit ani, ei ringle, ei thile. ⁴ Nangni ki riet minthâr sabaka; nangni ko song tatak ani! Kin intaknangei murdia khom mohôknân ka la sip tita; râisânnân ki sipmat ani.

⁵ Macedonia kin tung suole khom inngamna reng dôn mak me. Muntina intaknangei aoma,

midangngei leh inkhalin kin oma, kin mulungrîngeia chinangei kin dôna. ⁶ Aniatachu Pathien mulungrîl inngûi minhar ngâipu han Titus a hong sikin mi mohôk minhara. ⁷ A hong sika han kin râiaminsân vai nimaka, ama'n kho angin mo nin mohôk minharna chang khom mi min rieta. Ama'n ni mu rang nin nuom tie ngei khom mi rila, nin mulung nin min ruongtie ngei le mi thop ranga nin inthok tie ngei; mi ril sikin atûn hin chu ka râiasân uol ani zoi.

⁸ Ke lekhamuthuon han nangni minngûi khom senla, ki miziek hah insîr khâi mu-ung. Chomolte chu nin inngûi ti ku mu lehan kên sîr ani. ⁹ Aniatachu atûn chu ka râiasân zoi nangni ki minngûi sika niloiin, nin inngûina han nin lampuingei nangni min thûl pe sikin. Ha inngûina hah Pathien'n a mang ani, male masikin nin chung a tho minchâi mak me. ¹⁰ Inngûina, Pathien'n a mang han mulungrîl inthûlna nangni pêkin sanminringna amintung ngâi sikin mahan insîrna om mak! Hannirese munisi inngûina mamangin chu thina amintung ngâi. ¹¹ En ta u, nin inngûinân Pathien sintho hih: ningsietna nangni min dôn tie ngei, nin theiloinaboi tie minlang ranga nin ngâklal tie ngei! Ma anga adikna tienga taksinangei, ma anga inningnangei, ma anga nuomnangei, ma anga inpêknangei, ma anga asaloi tho ngei dûkmintong ranga nin inthok tie ngei! Ma ngei roi han nangninanâkin minchâina reng dôn mak chei ti nin minlang ani.

¹² Masikin, ma lekhamuthuon hah miziek

khom rongka, atho minchâipu sika nimaka aninônchu tho minchâina tuongpu sika khom nimak. Manêkin idôr mo kin ta ranga nin inpêkna inthûktie, Pathien mitmua nangni min mu rangin ki miziek ani. ¹³ Masika han kêng mohôkin kin om.

Mohôka kin om vai niloiin; Titus nin lei sanna jâra a râisâna sikin keini khom kin râiaminsân sabak ani! ¹⁴ A kôm nangni ko song ngâia, male nangnin mâimôkinshakin mi dar mak chei. Nin kôm chongtak kin misîr bang ngâi, male ma anghan Titus kôm nangni ko songna han adik tiin ânlang zoi. ¹⁵ Male a rilnangei jôm rangin nin rêngin nin inthokngei, chi le innîk puma ama nin lei phâm ngâi hah a riettit sikin nin ta rangin a lungkhamna ânsôn uol zoi. ¹⁶ Nin chungka kên ngamphar thei sikin idôra râisân mo ki ni zoi!

8

Khristien pêkna

¹ Kin lâibungngei le sarnungei, Macedonia rama koiindangngei lâia Pathien moroina sintho lenna hah nin riet rangin kin nuom ani. ² Intaknangei an tong han minsin tatakina an oma; aniatachu, an râisâna alien tatakina sikin inriengtak nikhomsenla ngei, phaltakin pêkna an dôn ani. ³ An pharidôr chu an pêka, an phari nêka tam khom an nuom dodôrin an pêk ti nangni ki min riet minthâr ani. ⁴ An theia mulungsuokin Judea rama Pathien mingei sanna thona tieng khom sintum dôn sa rangin min ngên

ani. ⁵ Maha kin sabeina pêna ani! Amotona Pumapa kôm an pêk baka; masuole chu, Pumapa lungdôn kin kôm anninanâkin an inpêk nôk ani. ⁶ Masikin hi sin phutpu, Titus hih kin ngên, hi lungkhamna chuonsin alieka sa uol hih sin minzom tita nangni zoipui rangin. ⁷ Nin dôn murdi: taksônna ngei, thurchi misîr theina ngei, le rietna ngei, mi san ranga nin jôtna ngei le mi nin lungkhamna* han nin nei oka. Masikin hi lungkhamna chuonsin khoma hin phaltaka nin inpêk sa rangin nangni kin nuom ani.

⁸ Ite balamngei nangni khang pe ma-ung. Nikhomsenla midangngeiin mi san rang an jôt tie ngei nangni min mûn, mi nin lungkham hih adik tatak mo ti riet rang ku pût ani. ⁹ Ei Pumapa Jisua Khrista moroina hah nin rieta; nei bâk khomsenla, nangni a min nei theina rangin, nangni jârin amananâkin inrieng a chang ani.

¹⁰ Ku nuomlam chu nikuma nin phut hah atûn hin zoi unglâ chu nin ta rangin sa uol atih. Sin ranga aphut masa vai nimak choia, hannirese sin ranga a nuom masa khom nin ni sa. ¹¹ Hanchu ma chungâ han minngam titin, nan chuonsin hah zoi ta roi! Nin lei mintuo anghan zoi rangin jôt unglâ, male atûna nin dôn lam tak lehin tho roi. ¹² Pêk rang nin jôtin chu, nin dônloi chungâ niloiin, nin dôn chungâ nin neinunpêk hah Pathien'n khôk atih.

¹³⁻¹⁴ Nin chungâ puokrik nangni min pêlin midangngei mojôk rang pût mu-unga; aniatachu

* **8:7** 8:7: Keini ranga nin lungkhamna; miziek senkhat ngei an dôn chu nangni ranga kin lungkhamna.

hi zora hin atam nin dôn sikin, ânsam ngei nin san ngei hah asa ani. Hanchu, nangni nin insama anni an dôn mintam khomin nangni san an tih. Ma anghan in-angna om atih. ¹⁵ Pathien lekhabu'n, "Arût mintam pu han dôn mintam uol maka, male arût mintôm pu han dôn mantôm uol mak," ati anghan.

Titus le a champuingei

¹⁶ Nangni san ranga kin jôt anghan Titus mulung sũaga jôtna min dônpu Pathien chung a kin râiasân tatak! ¹⁷ Kin ngênna a lei modôm vai niloiin; ama theia mulungsuokin nangni san rang jôtin nin kôm hong rangin a masat ani. ¹⁸ Ama leh lâibung inkhat thurchisa misîrna sin a thona sika koiindangnei murdi'n an jâ tatak ngâipu hah kin juongtîr sa. ¹⁹ Male mapên han, ama hih lungkhamna sin Pathien roinpuina rang le nangni san kin nuomna minlangna rang kin chuonsina le khuolchaina mi jûi ranga koiindangnei in an thanga an phun ani.

²⁰ Phaltaka neinunpêk tam kin semna roia hin tute chiernangei akaithoi loina rangin kin indîn ani. ²¹ Kin neinunkhîn chu Pumapa mitmua vai niloiin, midangnei mitmua khom dikna sin hih ani.

²² Masikin anni lehan kin lâibung inkhat kin juongtîra; vêl tamtak kin minsina male nangni san rang a jôt tatak tiin kin riet. Male atûn vâng chu nin chung a mulungngamna a dôn sabaka, nangni san rang a jôt uol ok zoi. ²³ Titus hi

chu, ka champui le nangni sanna sin ni thopui ngâipu ani; lâibung dang a champuingei hi chu koiindangnei ruthûla Khrista kôm roiinpuina mintung ngei an ni. ²⁴ Anni ngei kôm han nin lungkhamna minlang roi, masikin nangni kin songna chungroi hin kin dik ti hih koiindangnei murdi'n an riet theina rangin.

9

Iempu ânsamngei ranga sanna

¹ Judea rama Pathien mingei sanna muthuona aom chungroia hih nangni miziek pe rang nâng tet mak. ² San rang nin nuom tiin ki rieta, male Macedonia rama mingei kôm, “Achaia rama lâibungnei le sarnungei,” anni chu, “Nikum renga san rangin an inthok sai kêng ani zoi.” tiin nangni ko song ani. Nin jôtna han an lâia mi tamtak akaithoi minhar ngei ani. ³ Atûn hin hi lâibungnei hih ku juongtîr ngei ani, masika han nangni kin songna chungroi hah chongbâingei koronga ânlet lolina rangin. Aniatachu, ki tisai anghan, nin sanna lehan inthoksaiin lei om roi. ⁴ Nikhomrese, Macedonia ram renga mingei ngânin ni juong jûiin nin inthok loi juong mu duoi ta rese ngeia, idôr mo kin inzak rang — nangni nin inzak rang pairakin — tak nangni kin sôn sabak tie ha! ⁵ Masikin neinunpêk ranga nin inkhâm hah nin lénthok theina rangin hi lâibungnei hih ko motona nin kôm lei juong ranga ngên rangin anângin ki riet. Hanchu ku juong tung tena chu lântuosai nîng a ta, male

nin dôn sika niloiin nin nuom sika nin pêk ani ti inlang atih.

⁶ Chimu tômte lingpu han sâkthar tômte dôn a ta; chimu atam lingpu han atam dôn atih, ti hih riettít roi. ⁷ Hanchu, nin sisika, nin masat angin nin pêk rang ani, insîr pum le nin sintum ani ti rietloi niloiin; mulungtâihieia pêkpu hah Pathien'n a lungkham ngâi sikin.

⁸ Male Pathien'n nin nâng nêka tam nangni a pêk thei, masikin nin nâng murdi nin dôn tita, sin asa ngei rangin dôn thei uol nin tih. ⁹ Pathien lekhabu'n,

“Phaltakin ânsamngei kôm a pêk ngâia;

a lungkhamna chu tuonsôtin adier ngâi,” ati anghan.

¹⁰ Male Pathien'n, chimuru rethe ranga pêkbang ngâipu le vâipól sâk ranga pêkbang ngâipu, han chimu nan nâng murdi nangni pêkbangin nangni minsôn pe a ta, phaltaka nin pêkna renga han amara tamtak mintûp rang nangni musuo pêng atih. ¹¹ Phaltaka nin pêk tit theina rangin Pathien'n nangni min nei tit a ta, mi tamtakin nin neinunpêkngei keini renga an man sika han Pathien kôm râisânchong misîr an tih. ¹² Hi nin chuonsin hin Pathien mingei an nângngei a mintongngei vai nimaka, Pathien kôm aliemrak dôra râisânchong misîrna lientak khom amusuo ngâi ani. ¹³ Male nin chuonsin minthârna amintung sika han mi tamtakin Pathien kôm roiinpuina pêk an tih, Khrista thurchisa nin phuong ngâia iem nin om sik le an ta rang le

mitin ta ranga phal tatak nin insepui ngei sika han. ¹⁴ Male masikin moroina inthûk tak dônin chubai nangni tho pe an tih, Pathien'n moroina aliekasa nangni a min mu sikin. ¹⁵ Amanboi neinunpêk sika han Pathien kôm râisânchong misîr ei tih u.

10

Paul'n a sinthona a rung ngâi

¹ Keima, Paul, nin kôm ko om lâihan nin chungu innuoitak le dâiriema omin, aniatachu nin kôm ko omloi lechu nin chungu lumraka om ngâipu an ti hin. Khrista nunnêmna le lungkhamnân misangin nangni ke ngên. ² Nin kôm ku juong zorân rammuol mingei mulungbôkngai anga sinthoa mi bê ngei chungu chu ku lumrak ngêt rang khomin; nangni nin chungu chu lumrak loi rangin ni namnôl loi rangin nangni ke ngên ani. ³ Mahi adik rammuola lêng chu kin ni, aninâka rammuol mingei mulungbôkngai angin chu doi mak meh. ⁴ Indoina rârovongei kin mang ngei hi chu rammuol rârovongei hih nimaka, aniatachu Pathien rârovongei ranakrâttak ngei kêng ani, maha kulpuidetngai sietminmangna rangin kin mang ngâi ani. Inkhalna dikloingei kin minheka; ⁵ Pathien rietna khâr ranga inpâkna lamchâingei murdi hah kin seta, mindonna murdi sûrmintangna renga tuongin Khrista chong kin min jôm ngâi ani. ⁶ Male iemom tatak nin ni minthârna nin dôn suole chu, iemomloingei dûkmintong rangin inthok kelen kin tih.

⁷ Nangnin neinunnghei hi pêntienga ânlang vai kêng nin en ngâia. Mahan tumakhatin amapa mo, amanu mo Khrista mîn ân bê an om mini? Asa, an omin chu an thethenin an chungroi mindon nôk rese ngei, anni ngei an tho angtakin keini khom Khrista ta kin ni sikin. ⁸ Nangni setna rang niloia, nangni sinmindingna ranga Pumapa'n rachamneina mi pêk hih insongpui ok khom rong a inzak ma-ung. ⁹ Ke lekhamuthuonnghei hin nangni misih anga ânlang rang chu pût mu-ung. ¹⁰ Tumakhatin, "Paul lekhamuthuonnghei hi chu ana le ânngar ani, aniatachu ei kôm a omin chu ânzala, a chongnghei khom ite nimak!" tîng an tih. ¹¹ Ma anga mingei han mun danga kin oma kin lekhamuthuonnghei leh nin kôm kin oma kin sintho rang hah ateina reng om mak, tiin an rietthei ngêt rang ani.

¹² Adikin chu anni le anninanâk ân pâka ân sâng oka ân bê ngei lâia han intelin anni leh intêk ngam mak me. Idôra amo mo an ni! Anninanâk an inkhina rang leh an injêkna rangin balamnghei an sinna! ¹³ Nikhomrese, keini rangin chu, kin insongna hah tentanangei khêl no nia; Pathien'n sintho ranga tentanangei mi dar pe sũaga han ani ngâi, male nin lâia kin sintho khom hih ahuom sa. ¹⁴ Male ma tentanangei sũaga om nin ni sikin Khrista Thurchi Sa chôia nin kôm kin juong lâihan khom tentanangei pêna chu se mak me. ¹⁵ Masikin Pathien'n tentanangei mi dar pe pêna chu midangnghei an sin hah song mak me. Manêkin, nin taksônna hah hônson a ta, male Pathien'n tentanangei

mi dar pe sũaga chu zoratin nin lâia sinthona lien uol ok tho thei kin tih, tiin kin sabei ani. ¹⁶ Hanchu Thurchi Sa hih nin kôm pênâ ram danggeia khom misîr thei kin ta, mun danga mîn sin an lei tho sai hah song noni ung.

¹⁷ Aniatachu Pathien lekhabu'n ati anghan, "Tukhom a song nuom kaiin chu Pumapa sintho hih song rese ngei." ¹⁸ Eini nanâkin asa kin ni tiin ei mindonin chu pomna chang ngâi mak mea, Pumapa'n asa tiin mi mindon pe tika kêng pomna ei chang tatak ngâi ani.

11

Paul le Tîrton dikloingei

¹ Ân môl siei anga ko om lâi khomin mi nin tuongdier pe rangin ku nuom. Rangâihoitakin tho roi! ² Pathien narsana angin kêng nangni ka narsa; dôngmate inthiengtak angin nin nia, pasal inkhat vai, Khrista ngêt lehan in nangni min nei ranga kên khâm pe ngei nin ni. ³ Nin mulungbôkngai hah hong sietin Khrista taka nin inpêkna akip le ânthieng hah mâkrak nin tih, ti hih ki chi ani ma angdên han Eve hah murûl vârna milakngai han huongin aom ani. ⁴ Tumini nin kôm juongin Jisua dang, a thurchi kin misîr niloi a juong misîra; râisântaka nin lei rangâi thei sik le keini renga nin man niloi Ratha le thurchisa adang viek ratha dang le thurchisa dang nin lei pom sikin!

⁵ Aliekin, “tírtongei” tia nin koi ngái ngei nêka chîn uol ki ni rangin chu mindon mu-ung!
⁶ Thurchi misîr chu ke theibâkloi khom ani thei, aninâka rietna tieng chu ma anghan ni tet maka; maha chu zoratin le lampui tina khom nangni kin minthâr pe suo zoi ani.

⁷ Pathien Thurchi Sa nin kôm ku juong misîr lâihan ite neinun nangni ngên mu-unga; nangni chôiminsângna rangin keimananâk kên nuoi ani. Maha ko tho minchâi mo? ⁸ Nin lâia sin ko tho zorân koiindang adangngeiin sanna min pêk ani. Masikin chongna rangin, anni ngei murûkin ke nangni ka san ngái ani. ⁹ Male nin kôm ko om sêng han sum kên sam zorân tute nangni minjêl mu-unga; Macedonia ram renga lâibunggei le sarnungei an hong han ka nâng murdi min juong chôi pe ani. Sûnnúk tienga anghan, sûnmoton tieng khom nangni rangin puokrik ni tet no ning!
¹⁰ Khrista chongtak keima taka om sika han hi kên songna hih Achaia ram pumpuia dâirek noni tih hih kên khâm ani. ¹¹ Nangni ku lungkham loi sika mahi ki ti mini? Pathien'n nangni ku lungkham tatak tiin a riet ngái ani!

¹² Atûna sin ko tho anghin tho tit ki tih, “tírtongei” adangngei hah an insong thei lolina rang le keini kin sintho angtakan sin an tho an ti thei lolina rangin. ¹³ Ha mingei hah tírton dik nimak ngei, anni ngei hah tírton dikloi an nia, an sinthoa milak thoa Khrista tírton tatak ngei anga inlang ranga ânthok ngei ha an ni. ¹⁴ Asa, kamâm rang om mak! Soitan luo mana vântírton

vâr angin inlang rangin ânthok duo! ¹⁵ Masikin a tîrlâmngei khom dikna tîrlâmngei anga inlang ranga an inthok hih neinun kamâmom ni uol mak. Amongna chu an sinthongi angtakin an man rangrohoi hah la man an tih.

Tîrton anina sika Paul tuongngei

¹⁶ Ki ti nôk: tutên amo angin mi mindon no rese ngei. Aniatachu nin mindonin chu, alekti luo kên song theina rangin amo angin ni pom roi. ¹⁷ Adiktakin atûna ki ti hi chu Pumapa'n ti ranga ni nuom anga ki ti nimaka; hi insongna roia hin chu amo tatak angin ko chong ani. ¹⁸ Hannirese mi tamtak munisi ninangei song an om sikin kei khom ma angdênin tho ki tih. ¹⁹ Nangni chu nin vâr tatak, male masikin râisântakin amo ngei ha nin tuongzit ani! ²⁰ Nangni chu mîn nangni dânde khom rese ngei, inlâpnân nangni mang khom rese ngei, chângang nangni min ôk khom rese ngei, nangni enminnuoi khom rese ngei, nin mâia nangni bên khom rese ngei nin tuongzit ngâi. ²¹ Ha neinunngai hah tho rangin chu kin chi rai sikin apom khom kên zak!

Hannirese tukhomin i-ih lama khom an insong ngamin chu — amo angin ko chong ani — kei khom ka hâi ngam. ²² Hebrew mi mo an ni? Kei khom ki ni. Israel mi mo an ni? Kei khom ki ni. Abraham richisuonpârngai mo an ni? Kei khom ki ni. ²³ Khrista tîrlâmngei mo an ni? Achâng ku phuo nâka chu anni rangin chu keima ke tîrlâm asa uol ki ni! Sintho ranak ko song uol ok, intângna ina ku lût zora atam uol, vîkin ko om uol, male vêl tamtak thi vavângin ko om

uol. ²⁴ Judangeiin voisômthum voikuo chum rangnga min tôka; ²⁵ Rom mingeiin voithum min vîka, male voikhat lung leh dêngin ko oma. Voithum rukuong sietna ko tonga, voikhat chu sũnkhat jân khat tui chungã ko oma. ²⁶ Ku khuolchaina voi tamtak tuilien ichîn, inru ichîn, ku Juda champuingei ichîn, Jentailngei ichîn; khopuiliengnei sũnga chĩna tongin, rama chĩna tongin, tuipuiliengneia chĩna tongin, male mal saloingei chĩn ko om ngâi. ²⁷ Ki sinthona ko sôl rai sika inloia ko om tik atam ngâi; vonchâm le tuiinrâlin ko om ngâia; bu ko khop loi tik, omna rang ka man loi tik, aninônchu puonsil kên vâi tik atam ngâi. ²⁸ Male neinun dangngai tiloian, koiindangngai murdi ki mindonna ni delin nĩngtin ko om ngâi. ²⁹ Tumakhat an inzalin chu, kei khom kên zal ok ngâia; tumakhat sietna tieng tuongin aomin chu beidongin ki sip ngâi.

³⁰ Ko song ngêt rangin chu kên zal tie ânlang neinunngai hih song ki tih. ³¹ Pumapa Jisua Pathien le Pa riming chu tuonsôtin satvurin om rese! milak tho mu-ung ti a riet ngâi. ³² Damascus taka ko om lâihan, Rêng Aretas nuoia râiôt'n mi sũr rangin khopui mokotngneia rungnguei a dar ani. ³³ Aniatachu kok sũnga kulpui bang in-onga min mathâka, ma renga hah ko rotpai ani.

12

11:23 11:23: Sin 16:23 **11:24** 11:24: Bal 25:3 **11:25** 11:25: Sin 16:22; Sin 14:19 **11:26** 11:26: Sin 9:23; 14:5 **11:32** 11:32,33: Sin 9:23-25

Paul inlârnangei a mu le chongphuongnei

¹ Kên song ngêr rang ani, ite asena aom loi rang khomin. Aniatachu atûn Pumapa'n inlârnangei mi min mu le chongphuong rang mi pêk ngei hah misîr ki tih. ² Khristien mi inkhat invân insângtaka khin juong lâkin aom ti ki riet ama hah kum sômleiminli ani zoia (mahi ataka mini, inlârna a mu mini riet mu-ung Pathien vaiin a riet). ³⁻⁴ Ki ti nôk, ma miriem hah Paradis taka rangin juong lâkin aom ti ki riet (mahi khom atak mini, inlârnân a mu mini riet mu-ung — Pathien vaiin a riet), male ama han chong a misîr thei loi, le munisi mûrngeia misîr ranga phal loi neinunnei a hong rieta. ⁵ Masikin hi mi hih song ki tih — aniatachu ko dok tie ânlang neinunnei tiloiin chu keimananâkin chu insong no ning. ⁶ Insong nuom khom rong, amo chu ni no ning, chongdiktak ki misîr rang sikin. Aniatachu insong no ning, tukhomin min mu angin le keima renga chong an riet lam nêkin min mindon minsâng laina rangin.

⁷ Kamâmom neinunnei tamtak ku mu ngei sikin inpâknân ki sip laina rangin taksatieng damlaina natak pêkin ko om ani, maha kên pâk laina ranga Soitan thangtheipu anga sinthoa ni jêm ngâi ani. ⁸ Ma natna hah mi khâi pai pe rangin voithum Pumapa ke ngênna. ⁹ Aniatachu ama'n, "Ko moroina hi kêng na nâng ani, na râtloi zorân kêng ki sinthotheina akip ngâi," tiin mi thvon ani. Hanchu, ku chung a Khrista sinthotheina mi rungna hi rietna rangin râisântakin ka râtloinangei hih song ki tih

zoi. ¹⁰ Khrista jârin chu râtloinangei, êronangei, intaknangei, nuomlonangei le dũktongnangei khom ku mulung achuk. Ka râtloi zorân kêng, ka rât ngâi sikin.

Paul'n Korinth mingei ranga a mindonna

¹¹ Amo angin ko oma — aniatachu nangnin mo rangin mi nin tho pe sikin. Nangni kêng mi nin pomna minlang rang nin ni. Ite ni no khom rong, i-ih lampuia khom alieka nin, “tĩrtonggei” nêkin chu chin uol no ning. ¹² Tĩrtong ki ni minthârnân sininkhêlgei le neinun kamâmomngei tamtak nin lâia dierna tatak dônin ki sin ani zoi. ¹³ Koiindang adangngei nêka saloi uola enin inmo nin om, sumtienga sanna nangni ki minjêl lolina hah ani nônchu? Rangâihoitakin ki dikzoiloina hah ni ngâidam roi!

¹⁴ Atûna zora hih nin kôm juonga nangni juongpan rang kên thok voithumna ani zoi, male ite nangni sîng no ning. Ka nâng chu nangni hah nin ni, nin sum nimak. Mangei murdi suole, nâingeiin an nulepangei sem rang an dôn rang nimaka, nulepangeiin kêng an nâingei sem rang an dôn rang ani. ¹⁵ Nangni sanna rangin ko dôn murdi râisântakin thâm let ka ta, male nangni sanna rangin keima khom inpêk let sa ki tih. Nangni ku lungkham sabak sika han mi nin lungkham bâkloi rang mini?

¹⁶ Hanchu, puokrik nangni ka chang pe loi hah chu nin jôtinruol atih. Hannirese tumakhatin keima hih milaka sip, male milakngei leh nangni a min ôk zoi ani la tîng an tih. ¹⁷ Inmo? Nin kôma

thangtheipungei ku juongtîr ngei mangin nin chung a inlâpna ko rok rang? ¹⁸ Titus hah juong rangin ke ngênna, male iempu dang hah ama leh ku juongtîr ani. Titus'n nin chung a inlâpna a rok nin ti thei rang mo? Ama le keima hih bôknangei inmunnin lampui inkhata singinsa'n sintho ngâi mak me mo?

¹⁹ Nin kôm kin dikna thurchi kin misîr tit angin nin mindon thei. Nimak! Khrista'n kin chong ranga mi nuom anghan Pathien makunga kin ti ani, male ruol moroitak ngei, neinuntin kin tho ngei murdi hih, nangni sanna rang kêng ani. ²⁰ Ku juong tika ku nuom lamin nangni mu loiin ti le nangni khom nin nuom lamin mi nin mu nôncu ti hih, ki chi ani. Inkhalnangei le narsanangei, mulunglumngei le ranghuolna rokngai, êronangei le mûrtamnangei, inpâknangei le bâiinkhamnangei ku juong mu rang mini ti hih, ki chi sa ani. ²¹ Ku juong nôk tika ka Pathien'n nin mitmua mâimôkin mi dar ni ti, le zora vunsaia mi tamtak sietna an sina an nunchan saloi neinunngai, an ngâituina le hurna sietnangei renga insîr loipu ngei hah ka chappui rang mini ti hih, ki chi sa ani.

13

Azoinataka inningnangei le chibaimûknangei

¹ Atûna nangni ku juongpan rang hih avoithumna ani. Pathien lekhabu'n ati anghan, "Nônna hah rietpuipungei inik mini, inthum

mini an om vaiin kêng mindet ani rang.” ² Zora vunsai sietna sinpu ngei, le midangngei murdi khom nangni ril ku nuom ania; nin kôm ku juong avoinikna han ki tisai, aniatachu atûn hin nin kôm ko om loi sikin ti sir ki tih: Ku juong nôkin chu tute sepna renga rotpai thei no tunui. ³ Khrista, keima renga a chong ngâi minthârna nin rok hah anrêngin mûng nin tih. Ama hah nangni a mindon zorân, ama chu inzal ngâi maka; manêkin, nin lâia a sinthotheina a minlang ngâi ani. ⁴ Ama hah râtloinân khrosa jêmdelin thatin om khomsenla, Pathien sinthotheinân aring tit ani. Keini khom ama leh inzomin râtloi kin nia; aniatachu nangni leh kin inzomnangei sikin a ringna han Pathien sinthotheina chang sa kin tih.

⁵ Taksônna han nin om le nin omloi nin riet theina rangin nangninanâkin minsin ngâi unglâ, injêk ngâi roi. Khrista Jisua hih nangnia han aom nin riet minthâr nimak mo? minsina han nin kâi tetloi ani noa anin chu. ⁶ Minsina han keini chu akâiloi nimak me la riet nin tih tûn, iemzoina ko dôn. ⁷ Ite asaloi nin tho loina rangin Pathien kôm chubai kin tho ngâi — kin thangsuna minlangna rang niloîn, hannirese keini chu akailoîn om khom rong unga, nangnin adik nin tho theina rang sika han. ⁸ Chongtak rang sika ani nônchu, adoi rangin chu sintho thei mak me. ⁹ Kin inzal zora khom nin lei rât ngâi sikin kin râiasân ani. Masikin akiphar nin hongni theina rang khomin kin chubai sa ngâi. ¹⁰ Masika han kêng mahi nin kôm ko om loi zorân

ki mizieka; nangni setna rang niloiin, nangni sinmindingna rangin rachamneina Pumapa'n ni pêk hih mangin ku juong tung tika nin chungu ku lumrak loina rangin.

¹¹ Male atûn chu, ka lâibungngei le sarnungei, dam roi! Akippharna rangin rujûl unglu; ke ngênnangei rangâi roi; inkhat le inkhat jôtinruol unglu; inngêiin lêng roi. Male lungkhamna le inngêina Pathien hah nin kôm om atih.

¹² Inkhat le inkhat inngêina intum inthiengin chibai inmûk inlôm roi.

Pathien mingei murdi'n chibaingei nangni an hong muthuon.

¹³ Pumapa Jisua Khrista moroina, Pathien lungkhamna, le Ratha Inthieng inloppuina hah nin rênga nin kôm om rese.

**Pathien Lekhabu Inthieng Chongtung Thar
The New Testament in the Sakachep language of
India: first Bible translation**

copyright © 2017 The Word for the World International

Language: Sakechep (Sakachep)

Contributor: The Word for the World Southeast Asia

Pathien Lekhabu Inthieng Chongtung Thar

Sakachep New Testament

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 22 Feb 2024 from source files dated 15 Apr 2023

2293c4a5-46d6-5769-ab81-b9a249d9205a